

欽定大清會典事例

卷七十六

吏部
除授

欽定大清會典事例卷七十六

吏部

除授

捐納 候選 考補 騰錄

軍機處 繕譯

上諭 官員 議敘

捐納候選。○原定各項捐納人員俱令取具本

籍赴選文結到部後毋庸自行具呈驗照吏部

於二十日查明原捐衙門咨文具稿註冊其有

應行查者亦於二十日內咨查俟查覆到日再

行註冊各照捐納日期先後歸於各班分缺選

用如有與例不符者即行咨駁不准註冊至捐

納人員有銓選無期情願具呈註銷准其註銷

進士舉人。仍照原科分補用。捐升離任官員。仍

照原職補用。其貢監生員。准其仍以貢監生員

應試。至未經出仕捐納數層。止具呈註銷一二

層者。概不准行。

已經出仕捐升者。准其註銷。升銜照原職用。未經出仕者。則將

捐納悉行註銷。不准註銷。一、二層如貢監生員捐州判。又捐知縣。又捐通判。止註銷。通判知縣

類之。○乾隆二十一年議定。凡初捐人員。戶部咨

文到部。扣足五十五日之限。方准銓選。至舊班

已捐本項。新班仍捐本項人員。如所捐選用月

分。與原捐無異。戶部咨文到部。毋庸扣限。如舊

班止捐雙月選用。及止捐單月選用。新班加捐

不論雙單月即用人員。其原捐雙月者。單月非
應選之員。仍於單月扣限。原捐單月者。雙月非
應選之員。仍於雙月扣限。○二十三年奏准。同
日捐納者。於戶部咨文過部之日。傳集上捐官
生。先行掣定名次。先後挨選。並出示曉諭。○三
十九年議准。官生上捐後。由戶部知照各本籍
督撫。於准咨之日。即行知布政司。分發各州縣。
該州縣奉文之日為始。毋庸俟本員具呈。即查
明該員有無違礙事故。取具鄰族甘結。逐名造
具赴選冊結。限以半月出詳。再以出詳日起。至

府司轉詳督撫出咨之日止。中間扣除程途日期。再限半月。統以一月之期咨部。儻有書寫舛錯。於定例無礙。即由府司院查明更正。不得藉稱駁換。聲明扣展。仍於咨文內。將由本員具呈起限。或由該州縣奉文之日起限。並出詳府司轉詳督撫各日期聲敘。以便查覈。儻有違限。一經查出。將州縣官並知府司道。及出咨督撫一併分別議處。其有親身在部報捐。未及回籍各員。及八品以下佐雜等官。例應在籍候選之員。即遵照定限。徑詳督撫咨部銓選。毋庸本員親

齋以杜弊竇。○四十年議准報捐官生。於具呈時。均令呈明其父有無欠項。及完欠若干。由戶部查係例限已逾。或未逾。而數在三百兩以下者。即令照數全繳。方准報捐。其有欠數較多。尚在例限以內者。准其先行報捐。仍將未完銀兩著落該員按照原限如數全完。一面知照吏部。儻逾限不完。已選者即行解任。未選者停其銓選。若報捐時。將欠項隱匿。不行聲敘。事後別經發覺。將所捐之官註銷。仍照隱匿例治罪。嘉慶十二年

年。於其父有無欠項及完欠若干下。增入並援例呈請開復之員九字。

○又議准

由貢監生遞捐知府。及未經筮仕候選人員遞捐者。於輪班得缺時。止准以簡缺選用。所有繁缺。概不准其掣選。在部郎中。員外郎。保送引

見奉

旨記名以繁缺簡缺用。後經援例加捐者。仍照原定之缺。分別選用。外官現任加捐人員。如係曾任直隸州知州。同知。及州縣正印等官。仍照舊無論繁簡之缺。一體銓選。至由別項佐雜遞捐者。亦照初任人員之例。俱以簡缺選用。其例不截取。及未經俸滿之滿漢京職捐升人員。由吏部

行文各該堂官。詳加查覈。或堪勝繁缺。或僅堪
簡缺。確實聲明。出具考語。咨送吏部註冊。照例
銓選。加捐分發知府。原應專以簡缺選用者。分
發後。不得以繁缺題補。其無簡缺省分。即毋庸
歸入分發。○四十七年奏准。現任各官。援例捐
升。未經銓選。緣事降革。續經捐復原官。其捐升
之項。不准隨帶。如有後經本案審明開復。或隨
本奉

旨留任者。准其帶於新任。仍歸原班選用。○嘉慶五
年奏准。捐升人員。報捐離任後。已取有交代文

結報部。即係實已離任候選之員。遇有降調處分。應照捐升品級。遞降註冊銓選。如雖捐離任。尚未有交代文結報部。仍係現在官。遇有降調處分。概不准照捐升品級。遞降註冊銓補。○又奏准。現任正佐等官。遵例捐升人員。未經離任之時。不准先換頂戴。○八年奏准。報捐官生。隨任祖父。及親伯叔。親兄弟。現任京外職官任所者。在京具呈本衙門。在外申報本省上司。准其請咨赴選。進士舉人。恩拔副歲優貢。亦准取具印結。具呈到部。俟行查禮部。如果科分名次。准

貢年分相符。亦准註冊銓選。均毋庸再取本籍文結。○又奏准。捐納人員。三代名字姓氏存歿。實在年歲。以及有無次丁等項。總以原取赴選文結為憑。不得任意呈請更改。○又奏准。官生上捐後。領有戶部執照。如由候補候選人員報捐者。查其業經取有本籍赴選文結。以及降革捐復人員。已有前任交代清楚。並回籍文結到部者。均免其重取文結。仍令該員取具同鄉六品以上京官印結。具呈到部。呈驗執照。查與捐冊相符。即予註冊銓選。○又奏准。捐納人員。給

有執照。由原籍地方官起文赴選者。該督撫嚴飭地方官。查明該員有無違礙事故。取具鄰族甘結。逐名造具赴選冊結。按限出詳。不得任意遲延。其中如有勒捐情事。准本員取具印結呈明註選。仍行文該督撫查明。果有勒捐情事。即行嚴叅究辦。如本員未經在籍具呈。率行赴部呈請註選。將本員嚴行議處。○十年奏准。現任外官。有經管倉庫錢糧。遵例捐升離任。及部選實缺人員。各督撫等於該員赴部時。確實查覈。咨文內聲明交代清楚。實無虧欠字樣。方准銓

選赴任。○十一年奏准。現任實授之員。捐升離任。續經註銷。仍歸原職補用者。悉令其以原缺坐補。○又奏准。各項候補候選人員。有情願註銷捐納官職。及分發等項者。除原係正班毋庸置議外。其註銷捐班之議敘數班數缺人員。凡未經註銷以前。已積班數缺數。統不准其接算。應以具呈註銷後。另行積班積缺。扣足原議敘之班數缺數。方准按班銓選。○又奏准。捐納道府。如係曾任知府。同知。直隸州知州。並州縣正印等官加捐者。及現任滿漢京職。堪勝繁缺。准

以繁簡各缺一體選用。其貢監生初捐及現任滿漢京職。僅堪簡缺。並外任佐雜等官遞捐者。專以簡缺選用。○又定捐納道府。加捐分發。不論繁簡。均准掣籤分發。俟試用一年期滿。其原係例准部選繁缺者。無論繁簡。均准該督撫酌量題補。至原係例應專選簡缺者。該督撫詳加察看。如果堪勝繁缺。據實奏明。留於該省。遇有相當缺出。酌量題補。其止堪簡缺。該省並無簡缺可補者。亦據實奏明。或歸部選。或改發有簡缺省分候補。請

旨定奪。○又奏定。舊例報捐分發教職。業經保送先用。復遵新例報捐過班分發者。與新例捐納人員。計缺輪用。先用新班初捐二人。次用舊班保送先用。捐過新班分發者一人。○又奏准。捐納各項人員。止准聲明實在之祖籍寄籍。其有占至二三省者。概不准行。○又奏准。援例捐升。未經銓選。緣事降革。續經援例開復原官。其捐升之項。不准隨帶。○十六年定。教職例選本省之缺。應各按本省所捐員數。掣定名次銓選。掣定後改歸原籍者。仍按原掣名次。入於改籍省分。

捐納人員名次之後。作為重數選用。○十九年定。援例開復原官。及病痊起用人員。如援例捐升者。州縣以上等官。病痊未經引

見者。准其先行捐升。仍俟引

見後再行銓選。援例開復人員。均應於引

見奉

旨後。始准其照例捐升。○又定。凡捐納京外官員。均

俟截卯後。戶部造冊。咨送吏部。各按所捐之項。

掣定名次先後選用。掣定後。因本員錯誤。聲請

更正者。將該員附於已掣人員之末銓選。若係

承辦官吏錯誤。扣除掣籤。奏請更正者。除將承辦之員照例議處外。其報捐之員。仍照原捐名數。添入名次籤。補行統掣。附於前次人員所掣名次之後。作為重數選用。

其議敘等項。如有應行補掣名次選用者。

亦即照此辦理。 ○二十年

諭。前據馬慧裕等奏。湖北江陵縣知縣捐升知府李若璋。請加捐離任留楚委用。當經降旨准行。茲經吏部查明。該員任內有承緝展參各案。均干降調。與報捐離任之例不符。請旨查銷。所駁甚是。殊為可嘉。直省各督撫具奏事件。不將例案原委聲明。朕安能一一

鑒悉。若一經奉旨允准。雖與例格礙之事。亦皆遷就奉行。轉非都俞吁咈並行不悖之意。吏部駁奏此案。朕不特不以為非。尚且加以嘉獎。各部院皆當引以為法。所有李若璋捐升知府。著註銷。令其仍回原任江陵縣知縣之任。馬慧裕係吏部司員出身。此等定例。豈得諉為不知。乃與張映漢聯銜具奏。實屬蒙混。馬慧裕、張映漢均著交部嚴加議處。欽此。遵。

旨議定。現任京外正佐捐升各官。任內如有展叅事關降調之案。遇輪屆應選到班時。不准銓選。並不准其報捐離任。至業經升調之離任人員。其於